

## IBRU

### Gigirum Me Ibru Igiyawa Munan Tenewa

#### *Usiwa Me Painauvit Aneya Me Mina Onan*

<sup>1</sup> Watavit ampa God me isimuranaiwa gumbo wane. Propeta gumbo kum obiren di, sira ebu obiren gumbe wane. <sup>2</sup> ✧ Kum gare oieba apa, Usiwa gumbe did nunne. God ane Usiwa me dividivi undag wadnewa me kwan autan oya. Usiwa gumbe dividivi undag piyuwawa ge kwiminauwa undag waramne. <sup>3</sup> ✧ Usiwa me God eyawa esinewa, me God anoanowawa irayauyau. Gae yusipamit gumbe dividivi undag waramnewa amaraivi. Me wait ane kukaeba muiinne, yusipama painauvitwa yutanwa apa yan wakene. <sup>4</sup> ✧ Usiwa me iviwa oraiwa kwan aune, aneya mina onan. Mame mina, me ane oraivitwa, aneya mina onan.

<sup>5</sup> ✧ God me aneya ambuwa gumbe mameib wane?  
“Ge ne Utunwa. Gare ge ne barau genna.”

Sira,

“Ne me Mamaven atna. Me ne Utunwa ape.”

<sup>6</sup> ✧ Sira God usiwa namui renwa baraune onnewa kumiwa apa, me mamaib wane,

“God aneyaeba mu Usiwa waiya waiya atanit di.”

<sup>7</sup> ✧ Sira aneya oya mamaib wane,

“God ane aneya taig mina,  
sira ane nau eme igiyawa iyam meru mina.”

<sup>8</sup> ✧ Usiwa oya me mamaib wane,

“God, ge kin seyaeba auwawa viripusiwa onan.

---

✧ **1:2:** Jon 1:3    ✧ **1:3:** Jon 14:9; 1Ko 1:20; lbr 8:1    ✧ **1:4:** Pir 2:9

✧ **1:5:** 2Sm 7:14; 1Kr 17:13; Sam 2:7; Apa 13:33    ✧ **1:6:** Deu 32:43; Rom

8:29    ✧ **1:7:** Sam 104:4    ✧ **1:8:** Sam 45:6-7

Ano oraiwa tutuwawa me Ge toimuwagwa tutuwawa.

<sup>9</sup> Ge oraiwa baigan ege. Ge ano kukaeba topai ege.

Meoya God, God geuma me ge painau barau genne,  
aigo geuma mu mina onan.

Ge waribiya gennewa me degadega oira kadmawa gumbe.”

<sup>10</sup> ☆Sira wane,

“Ayapan, ge namuiren piyu amatowanawa.

Kwimin me mina ge nanigap warana.

<sup>11</sup> Dividivi undag mame matai onanape.

Megara ge meib di wakeigima viripusiwa onan.

Dividivi undag matai enwape mina kukai mutpe.

<sup>12</sup> Ge dividivi mame matai wape yobutataewa mina panat-  
pewa,

Dividivi mame matai wape mina tobiyape.

Megara ge gembo den tobiya, sira ge bairawan geuma  
oieba onan.”

<sup>13</sup> ☆Aneya me ambuwa gumbe God mamaib watavit wane?

“Ge ne nanin yutanwa gumbe yan wakeya.

Ne matai atna, anavi geuma ge amagwa egave emtanwa  
ape.”

<sup>14</sup> ☆Aneya undag mu guwowa mu upeba munan nau  
emewa. God me aneya tene onamiyawa, waita kwanawa  
aupe igiyawa nau mumawa atan oya.

## 2

### *Umum Waivi Yaimoyai Anota*

<sup>1</sup> Meoya aninin anotunewa nu yayiai nonunup amarata,  
sira nu den kainto toigimta. <sup>2</sup> ☆Gae aneya gumbe wanewa  
yusipamit wan yoivi, sira gae togomiyaiviwa sira gae  
noiwa den aviviwa mu undag pui auya. Ayapan gaiyawa  
me kokavit yusipama, aneya gaiyawa me mina onan.

---

☆ **1:10:** Sam 102:25-27 ☆ **1:13:** Sam 110:1 ☆ **1:14:** Sam 34:7; 91:11

☆ **2:2:** Gar 3:19

<sup>3</sup> ✧ Nu waita mame oraiminavitwa topai atawa, me aninin nu guwawe anton? Me mina den ane nu ata. Waita waita mame, me wait namuiren Ayapan wane, sira Iyayapan mu anoyawa mu mame wag kiniyag nu meve did nuniya.

<sup>4</sup> ✧ God me mina me gumbe taibe ane. Me oya, God ane guwaguwawa, gina anat ge irayauyau. Sira puyo me Guwawa Iyakaisiyapama me anoano meuma gumbe kep aiviwa gumbe God taibe ane.

*Mamunwa God Ane Iesu Me Tatanaiwa Mina Ane*

<sup>5</sup> God ane, piyu mame oniviwa me gare mame vetewa, me matai aneya noiwa den aupe. <sup>6</sup> ✧ Megara apan da buka danave mamaib taibe waivi,

“Apan me aninin? Divi oya ge apan me oya anoege?

Apan usiwa me aninin? Divi oya ge me auwag amarege?

<sup>7-8</sup> Ge ana me aneya ankwatowo ane,

megara ge eyawa ge ayamatai kuiyave keret yusipama barauwana,

sira me dividivi undag me ama danave teana.”

God dividivi undag me ankwatave barauwana kumiwa apa, me ankwatave da den wakenewa God me den kwene.

Dividivi undag me apan ankwatave di wakeigimpe, megara gare mame nu meib den yavete. <sup>9</sup> ✧ Megara nu Iesu yavete. Mamunwa God ane Iesu kusi yan ane aneya

mina onan. Bo edawaeba gumbe me kin keret aune eyawa ge ayamatai gumbe. Me bo demtawa aug yaune, iyayapan undag munan, God ano oraiwa gumbe.

<sup>10</sup> Eyawa oya usitainawa obiren tam aitan oya, God ane, namuyoiyoi abnawa waita oya edawai obiren gumbe undagit oravit ane. Me God gumbe oravitwa, kuiyawa dividivi undag me God oya sira dividivi undag me God

---

✧ 2:3: Ibr 10:29; 12:25   ✧ 2:4: Mak 16:20; 1Ko 12:4,11   ✧ 2:6: Sam 8:4-6   ✧ 2:9: Pir 2:8-9

gumbe. <sup>11</sup> ☆Apan da bira ape iyakaisi, sira iyayapan mu ane iyakaisi ayawa, mu duwam megara desirom. Meiba oya Iesu me ubmam den ane megara munan wane, “Tatanaiwa.” <sup>12</sup> ☆Me wane, “Ne ge ivugwa tatanaiwa dirumpna.

Siosi danave ne bererin gumbe waiya gentna.”

<sup>13</sup> ☆Sira wane,

“Ne me gumbe anotumat eni.”

Sira wane,

“Yauya ne ge utuntainanwa mu God nednewa.”

<sup>14-15</sup> ☆Usitainawa undag di ge kwapuwa gumbe, meoya me mina di ge kwapiwa gumbe. Bo apa, Seitan me bo yusiwa gumbe wakenewa wakukamne. Sira me gumbe, iyayapan kwemne, kuiyawa iyayapan mu inaiinai muma kumiwa apa bo aeba gumbe ankwatave nau eme igiyawa wakeya. <sup>16</sup> Me Ebraam usitainawa yaieg onamiyawa gumbo waita munivi, aneya gumbo onan. Me natawa. <sup>17</sup> Meoya God gumbe, pirisi painauvitwa me anogugut oraimina ge anotumat oraimina aunewa atan oya, dividivi undag mu gumbo Ayapan me tatanaiwa mina ane. Me iyayapan kukaeba muma yankwetan oya. <sup>18</sup> Ayapan me amaorot aug edawai aune, meoya me oma ane iyayapan mu amaorot auemewa gumbo waita munivi.

### 3

#### *Iesu Me Kokavitwa, Mosisi Mina Onan*

<sup>1</sup> ☆Meoya, tatanaiwa iyakaisiopama mu kwiminan auvemewa. Iesu me apasoro ge pirisi painauvitwa me gumbe boruetewa. Me gumbe anoya. <sup>2</sup> Mosisi me God gweyawa

---

☆ **2:11:** Mat 25:40    ☆ **2:12:** Sam 22:22    ☆ **2:13:** Ais 8:17-18

☆ **2:14-15:** 1Jn 3:8; Rev 12:10    ☆ **3:1:** Nam 12:7; Ibr 4:14; 7:26

undag oya anotumat ane. Me mina, Iesu me anotumat aivi Mamunwa God me Iesu wait wat gomiyane gumbé. <sup>3</sup> Gwe sitan abnawa ayamata aupe, gwe mekut onan. Me mina, Mamunwa God ane Iesu me eyawa kokavitwa aune, Mosisi mina onan. <sup>4</sup> Gwe desirom desirom bira da me siyampe, megara dividivi undag wadnewa me God. <sup>5</sup> ✨ Mosisi me nau aivi abnawa, sira me God gweyawa undag oya anotumat ane. Me dividivi me matai wapewa taibe watanwa oya. <sup>6</sup> Megara Keriso me Usiwa, God gweyawa gumbé anotumat aivi. Nu degadega me kikikit autanwa ge anoenewa oraiwa gumbó wakeyawa, mu yusipamit oieba kumiwa oya amaraigimtawa, nu God gweyawa.

*Anotumat Onanwa Mu Oya Gwangwan Waivi*

<sup>7-8</sup> ✨ ✨ Meoya me Guwawa Iyakaisiyapama waiviwa mina,

“Ye gare mame noiwa anoyawa, nonewa den yaigiwape. At inguiwa arawa apa amaorot auyawa kumive, ye ayana God danapiriwane. Me mina, nonewa den yaigiwape.

<sup>9</sup> Ye isimureaiwa me amaorot ag yaunegiya, sira bairawan 40 danave mu nau neuma yauya.

<sup>10</sup> Meoya me kumiwa gumbé ne danampiriwa togomiyana, sira wana.

Mu evedni nonomagowa ipun eme, sira mu ne ebuwanwa den yaug anoya.

<sup>11</sup> ✨ Ne danampiriwa gumbé agi neuma ana.

Ne mu gumbó bairawan den veni, mu ne nonenwa emeniwa den aupe.”

<sup>12</sup> Tatangwanen. Ye guniyap da, bira da nonemagawa kukaeba go nonemagawa anotumat den aiviwa aug God

---

✨ 3:5: Nam 12:7; Deu 18:15-19 ✨ 3:7-8: Sam 95:7-11 ✨ 3:7-8: Eks 17:7; Nam 20:2-5 ✨ 3:11: Nam 14:21-23

wakenewa yankweg ube aipe ipewa, me bainda onan. ye yembovit yaiyai amaraya. <sup>13</sup> Kum wayawa gare, me danave yutuiwa garawan aya, sira ye bira da den nonemagewa yaigiwape kukaeba amaorot gumbe. <sup>14</sup> Nu anotumat amatonewa gumbe kikikit aug amaraigimtawa, nu Keriso oya nau desiroma. <sup>15</sup> ✧ Mamaib wane, “Ye gare mame noiwa anoyawa, nonewa den yaigiwape. Ye ayana God danapiriwane.

Me bainda onan. Nonewa den yaigiwape.”

<sup>16</sup> ✧ Bira anog ane God danapiri ane? Me iyayapan undag mu Mosisi amarag Ejipt dauwag onamiyawa, go onan? <sup>17</sup> ✧ Bira gumbe, God danapiri ane bairawan 40 danave. Me iyayapan mu kukaeba aya sira at inguiwa arawa apa boriruwayawa kwapuwa teyawa, go onan? <sup>18</sup> God agi ane sira wane, “Ne mu gumbo bainda den veni, mu ne nonenwa emeniwa den aupe.” Bira gumbe God agi ane? Me iyayapan mu God noiwa den auyawa. Bira da onan. <sup>19</sup> Meoya nu yaug anotu, mu oma den ane nonowa emtanwa den auya, kuyawa mu anotumat den eme.

## 4

### *Sabat Kumiwa Apa God Iyayapan Meuma Nonowa Em-tanwa*

<sup>1</sup> Meoya God oya unig nonunwa emtanwa oya agiyawa, me ande wakene. Ye da bira oma den ane unikpewa, me bainda onan. Meoya nu yaiyai amarata. <sup>2</sup> Gae oraiwa nunanwa oya opata wayawa nu me gaibu anotu. Mu anoya mina, nu meib anotu. Me desirom. Megara mu gae me anoyawa mu gumbo nau den ane, kuyawa gae anoyawa

---

✧ 3:15: Ibr 3:7-8   ✧ 3:16: Nam 14:1-35   ✧ 3:17: 1Ko 10:10

anotumat gumbe den aune. <sup>3</sup> ✧ Nu me anotumat atuwa nonunwa emtanwa unikta.

“Ne danapiriwa gumbe agi neuma ana.

Ne mu gumbo baina den veni, mu ne nonenwa emeniwa den aupe.”

God meib wane. God dividivi undag wadnewa kumiwa apa amatonewa, God nau meuma onanane. <sup>4</sup> ✧ Kuyawa God wane kum naningamben duwam oya, “Sira dividivi undag God nau meuma wadne onanane, sira nonewa emne kum naningamben duwam apa.” <sup>5</sup> ✧ Sira mapa wanewa, “Ne mu gumbo baina den veni, mu ne nonenwa emeniwa den aupe.”

<sup>6</sup> Meoya iyayapan upeba mu matai nonowa emtanwa oya unig atanwa mu ande wakeya. Iyayapan mu namu gae oraiwa anoyawa mu anotumat onanwa gumbe oma den ane unigiya. <sup>7</sup> ✧ Sira God ane kum da me “kum gare mame” ane. Sira bairawan obiren onanane, ivi God me Devid gumbes desiroma wait namu wanewa mina wane, “Ye gare mame noiwa anoyawa, nonewa den yaigiwape.”

<sup>8</sup> ✧ Josiya mu munan nonowa emtanwa munnewa, God ivi kum upeba oya da den wane. <sup>9</sup> Meoya Sabat Kumiwa nonewa emtanwa me ande wakene God iyayapan meuma oya. <sup>10</sup> ✧ God me nau meuma yankweg nonewa emne. Me mina bira da me God nonewa emtanwa unig aunewa, me nau meuma yankweg nonewa emne.

<sup>11</sup> Meoya nu nonunwa emtanwa mame nau yusipamit ag unikta. Noiwa den auyawa guwaguwawa mina bira da uyug aikpewa, me oraimina onan.

<sup>12</sup> ✧ God gaiyawa me wakeivi sira yusipama. Me donapama, donawa duwam debaiba mina onan. Me oma

---

✧ 4:3: Sam 95:11; Ibr 3:11   ✧ 4:4: Gen 2:2   ✧ 4:5: Sam 95:11   ✧ 4:7: Sam 95:7-8   ✧ 4:8: Deu 31:7; Jos 22:4   ✧ 4:10: Ibr 4:4   ✧ 4:12: Epe 6:17; Rev 1:16; 19:13-15

ane nonemagawa ge guwawa yu gomiyape, sira koniwa ge marednawa gaibu yu gomiyape. Me mina, anoano numawa ge inaiinai me nonun magave wakeiviwa, me oma ane yaug anope. <sup>13</sup> Dividivi undag me God wattenewa me matai God gumbe den guwawe ape. God yangave, dividivi undag en wape onan me taibe. Nu matai God gumbe nunanwa oya wata.

*Iesu Me Pirisi Painauvitwa*

<sup>14</sup> ☆ God Usiwa Iesu me nunanwa oya wakene. Me pirisi painauvitwa me kwimin danave wait aig unigne. Meoya nu anotumat gumbe boru atanwa me yusipamit amaraigimta. <sup>15</sup> Apan da oma den ane yutun onanwa oya den ano nunigimpe. Megara Pirisi numa kokavitwa me apan mame mina onan. Me kukaeba da den ane, megara nu mina dividivi undag gumbe amaerot me aune. <sup>16</sup> ☆ Meoya nu yusipamit anta ano oraiwa kin seyaeba oya. Me nu anogugut autan oya, sira me waita anoetewa gumbe ano oraiwa me waita nuntan oya.

## 5

<sup>1</sup> Pirisi painauvitwa undag mu iyayapan gumbo watgomiya munivi. Dividivi God gumbe, munan namuyoiyoi abnawa atanwa oya God wag barauya. Me kukaeba oya, puyo ge puyo maeba ag tobot wantan oya. <sup>2</sup> Me gaibu yusi onan, meoya iyayapan upeba mu den yaug anoya sira inaiinai mumawa gegeru gagaru aiviwa mu munan ano munigimpe. <sup>3</sup> ☆ Me meiba oya, mu yutu onanwa gumbe, mu kukaeba oya puyo wantanit di, iyayapan mu munan ge pirisi kokawa mumbo munan.

<sup>4</sup> ☆ Bira da ayammat mame oma den ane me mekut aupe. Aaron mina, God menan auwag wampe. <sup>5</sup> ☆ Me desiroma,

---

☆ **4:14:** Ibr 3:1; 10:23    ☆ **4:16:** Ibr 10:19    ☆ **5:3:** Rvt 9:7; 16:6  
 ☆ **5:4:** Eks 28:1    ☆ **5:5:** Sam 2:7



Keriso gaibu me ayamat me mekut den aune. Ayamats mame me pirisi painauvitwa atanwa oya. Me gumbe God wane,

“Ge me ne utunwa. Gare mame, ne ge barau genna.”

<sup>6</sup> ☆ Sira buka da apa tenewa,

“Ge pirisi meib di wakeigimpe viripusi onan, Merukisedek mina.”

<sup>7</sup> ☆ God me oma ane bo gumbe warinampewa. Keriso inaiiina meuma piyuwawa kumiwa apa, me nun ge anoiviwa God gumbe wanne it aen ge yanga turipam gumbe. Sira Keriso ayamateba gumbe Keriso nun meuma God aune.

<sup>8</sup> Keriso me God Usiwa, megara me noiwa aug autanwa oya yang anone edawai gina ubeube gumbe. <sup>9</sup> Sira God ane me oraivitwa ane, sira apan me oma ane Keriso amave amomewa igiyawa gumbo yaibobot waitaeba munigimtanwa ane. <sup>10</sup> God gumbe, me pirisi painauvitwa me Merukisedek minawa ane.

### *Gwangwan Uyug Gumbe Aig Aigiviwa*

<sup>11</sup> Ne Apan mame oya gaiyawa watanwa me obiren. Megara ye naunewa iyaimoyai den anoene, meoya aninin waton yaigiwane. <sup>12</sup> ☆ Ne anoeniwa me ye wait bairawan obiren onananewa, ye wait toewanewan apono. Megara ye God gaiyawa taibewa bira toewan yemtan oya anoene. Ye imuyap am mina yunattan anoene, nakwai yaigipama onan. <sup>13</sup> Iyayapan mu am mekut nemewa mu ud kikiyan mukut. Toewanewan me oraiwa oya mu den yang anoeme. <sup>14</sup> Megara nakwai yaigipama me iyayapan natawa mu munan. Me oraiminawa ambuwa sira kukaeba me ambuwa oya yang anotan ag yauya igiyawa mu munan.

---

☆ 5:6: Sam 110:4; Ibr 6:20; 7:1    ☆ 5:7: Mat 26:36-46; Pir 2:6-8    ☆ 5:12: 1Ko 3:1-3

## 6

<sup>1-2</sup> Meoya Keriso oya toewanewan amatonewa yankweta, sira oraiwa kokavitwa oya anta. Kukaeba me bo gumbe aiviwa apa nonunmagawa biroriyatanwa, God gumbe anotumat atanwa, babataito toewanewaneba, naniwa kuiyave barautanwa, bo gumbe sira inaitanwa, puiyuyu yaibobot aigimtanwa, mame me taibewa. Meoya mame oya sira den taig itan anta. <sup>3</sup> God baina wape ipewa, nu meis aigimta.

<sup>4</sup> Bira da eyawa aunewa, puyo kwiminawuwa demtawa meuma yaug anone, sira Guwawa Iyakaisiyapama gumbe kebanewa, <sup>5</sup> sira God gaiyawa oraiminawa ge piyu me matai uwapewa me yusipama demtawa aune, <sup>6</sup> ☆ megara ivi mu aikpewa, me apa ebu da onanape nonomagowa biroriyape. Mu God Usiwa sira korosi gumbe toeme mu mukut, sira ubmam me gumbe taibe baraueme.

<sup>7</sup> Piyu da uvin aikpewa yoi yaiyai aupe, iyayapan nau emewa munan nakwai oraimina iyaig yoipe ipewa, God piyu mame waribiyape. <sup>8</sup> ☆ Megara me gan ge wayo kukaeba yaipewa, me oraimina onan. Me ponan niyape, oieba apa me iyam oketpe.

<sup>9</sup> Megara, ye iyayapan neuma. Nu mamaib vete, megara yenanwa oya ne oraivitwa yeuma oya yusipamit anotumat yenen. Me waita yeuma gaibu. <sup>10</sup> ☆ God me oraivitwa, meoya yenan God imiwa den atataine. Ye iyayapan iyakaisiyopama gumbo waita yemne, sira gare mame waita yenivi. God iviwa oya ye baigan yeuma toewanene. God me oya den imiwa atataipe. <sup>11</sup> Nu mamaib anoetewa, ye desirom desirom ano yeuma yaigipam gumbe nu owanowan numawa oya anotumat yeuma amaraigimiya viripusiwa apa. <sup>12</sup> Iyayapan mu gwangwan

☆ **6:6:** Mat 10:22; Ibr 10:26-27; 1Jn 5:16    ☆ **6:8:** Gen 3:17-18; Mat 13:7,22

☆ **6:10:** Ibr 10:32-34

kwan muma anotumat ge yaimoyai gumbe aupe. Kuiyawa ye topaepam den aigimiya, megara iyayapan asime mu amowo aisiya.

### *God Agi Meuma Me Natawa*

<sup>13</sup> ☆ God me Ebraam gumbe agi wane. Me kumiwa apa, bira da God mina koka onan, meoya God me membovit gwangwan wane. <sup>14</sup> Me meis wane, “Ne natawa veni, ge waribiya gentna. Obiren gentna.” <sup>15</sup> Mame mina, Ebraam me uiwa nikiyane, meve me agi puyowawa aune.

<sup>16</sup> Me natawa, apan agi wapewa me kokavitwa gumbe. Agi yang anotanwa oya me gae waigimtanwa me matai tobotpe. <sup>17</sup> Meoya God anog ane. Iyayapan kwan meuma autanwa bira mu gumbo agi wanewa mu meiba yang anope gumbo taibe esipe, “God ano meumawa me matai den tobiyape.” God agi meuma gumbe wait bainya wane.

<sup>18</sup> ☆ Agi duwam mame den di tobiyape.—God me agi mame oya den di uga wape.—Nu wait ayun wattune owanowan namunuba autan oya. Agi duwam mame wakeya, me me gumbe nu matai yutunwa yusipamit autanwa oya.

<sup>19</sup> ☆ Ano mame me guwunwa gumbe yumatpe oraiminavit ge yaimoyai waketanwa oya. Sira ano mame me wape koka temporu danawewa danave unigne. <sup>20</sup> Iesu namui ren nunanwa oya unigne. Me ane piri si painauvitwa yaibobot. Me ane Merukisedek yumateba apa.

## 7

### *Pirisi Apan Merukisedek*

<sup>1</sup> ☆ Apan mame Merukisedek me Sarem kin muma, sira God painauvitwa piri si meuma. Ebraam kin upeba mut vin aune sira taig onivi, me kumiwa apa, Merukisedek me

---

☆ **6:13:** Gen 22:16-17    ☆ **6:18:** Nam 23:19    ☆ **6:19:** Rvt 16:2-3

☆ **7:1:** Gen 14:17-20

Ebraam nuntusag waribiyane. <sup>2</sup> Ebraam dividivi koniwa naninwanit danave kebag desirom wanne. Namuiren, iviwa tobiyak tetawa, me kin oraivitwa. Dawa me Sarem kin muma, natawa me yumtutu kineba. <sup>3</sup> Me mamawa onan, inawa onan, dam mu yumateba apa onnewa onan, wakewake amatonewa onan, inaiinai oieba onan, sira me ane God Usirenwa mina, me piri si yaibobot tunano.

<sup>4</sup> Yaiyai anoya apan mame me kokawa meuma antom. Ebraam me dam kuiyabariwa. Megara me mut warigin bog onnewa naninwanit danave kebag desirom Merukisedek gumbe wanne. <sup>5</sup> ☆ Rivai dam meuma usitainawa apa onnewa gumbo Gwangwan gumbe God wanewa, iyayapan gumbo koniwa naninwanit danave kebag desirom tampe. Mu Ebraam usitainawa, meoya mu iyayapan tatowaiwa. Megara mu iyayapan gumbo koniwa naninwanit danave kebag desirom tamiya. <sup>6</sup> Megara apan me Rivai dam meuma danave den wakenewa Ebraam gumbe koniwa naninwanit danave kebag desirom aune, sira me agi meuma aunewa waribiya wanne. <sup>7</sup> Pipangittanwa onan, apan painauwa me apan ankwatawewa waribiya wanne. <sup>8</sup> Mapa apan bira matai botopewa naninwanit danave kebag desirom avivi, megara ebu da gumbe apan bira iyayapan waya inainewa me aune. <sup>9</sup> Sira me nu wata, Rivai abnawa me koniwa naninwanit danave kebag desirom aviviwa mina koniwa naninwanit danave kebag desirom wanivi Ebraam gumbe. <sup>10</sup> Kuiyawa Merukisedek me Ebraam nuntosane kumiwa apa, Rivai me ande mamawa kwapirenmawa danave wakene.

*Iesu Me Merukisedek Mina*

<sup>11</sup> Piri si nau meuma me Rivai dam danave wakenewa gumbe mina ane oraiminavit ape ipewa,—me kuiyabariwa

---

☆ 7:5: Nam 18:21

apa God amatog Gwangwan iyayapan gumbo munne, — dividivi oya anoemewa me me apa wakeya? Divi oya pirisi da me Aaron yumateba onan megara Merukisedek yumateba mina wakenewa, yoine? <sup>12</sup> Pirisi nau meuma tobiyapewa, Gwangwan mina tobiyatanit di. <sup>13</sup> Apan me gumbe nu gae vetewa me dam da danave wakene. Dam me apa bira da iyakaisi kem meuma oya nau atanwa den onne. <sup>14</sup> ☆ Yaug anotanwa Ayapan numa me dam Juda apa onne, me natawa. <sup>15</sup> Mosisi dam mame oya pirisi oya divida den wane. <sup>16</sup> Pirisi me Merukisedek mina wakenewa yoipewa ne wait anin wanawa me taibe esipe. Me pirisi ane, me Gwangwan me kwapiwa gwangwaneba gumbe onan. Megara inaiinai yaibobot yusiwa gumbe me pirisi ane. <sup>17</sup> ☆ Apan mame oya aib wane, “Ge pirisi me Merukisedek yumateba apa wakenewa viripusiwa onan.”

<sup>18</sup> Gambenwa, gwangwan nunganwa yankwene, kuiyawa me yusiwa onan ge nau sira den ape. <sup>19</sup> ☆ — Kuiyawa Gwangwan me oraimina divi da den ane. — Oraiwa anoetewa wat toewan nunne, sira mame gumbe nu God gumbe uwawanta.

<sup>20</sup> Me God namive agi sig watanwa gumbe ane. <sup>21</sup> ☆ Mu pirisi God namive agi sig watanwa gumbe den aya, megara Ayapan pirisi ane God namive agi sig watanwa gumbe. God me Ayapan gumbe wag dine.

“Ayapan God namive agi watanwa gumbe wane, sira me gae meuma den tobiyape. ‘Ge pirisi yaibobot tunano.’ ”

<sup>22</sup> ☆ Mame gumbe, Iesu gwangwan oraimina oya wag kiniyane.

---

☆ 7:14: Ais 11:1; Mat 2:6; Rev 5:5    ☆ 7:17: Ibr 5:6    ☆ 7:19: Ibr 10:22;  
Jms 4:8    ☆ 7:21: Ibr 5:6    ☆ 7:22: Ibr 8:6; 12:24

<sup>23</sup> Mu boriruwayawa, mu pirisi nauwawa den aug avigimpe, meoya iyayapan obiren pirisi aya. <sup>24</sup> Megara Keriso inaig meib wakeigimpe viripusi onan. Me pirisi nauwawa me den tobiroriyatanwa avigimpe oieba onan. <sup>25</sup> ☆ Meoya, iyayapan mu Keriso gumbe God oya ampewa, Keriso oma ane waita muntanit di. Me evedni inaig wakeivi, sira me yapave yum tuivi.

<sup>26</sup> Pirisi kokavitwa mame me iyakaisiyapama, pui den aviviwa, danawa undag esinewa, kukaeba igiyawa gumbo ube, sira enagadne kwimin apa me painau opa. Nu imunup pirisi koka mame di. <sup>27</sup> ☆ Keriso me pirisi upeba mina onan. Me kum evedni me kukaeba meuma oya sira iyayapan kukaeba muma oya buyunai den aivi. <sup>28</sup> Kuyawa me membovit wanne, sira kum desirom gumbe ane onan di ane. Gwangwan waiviwa apan pirisi kokawa aivi. Apan desi desi yutu onan. Namu Gwangwan uwane, ivi God agi gaiyawa uwane. Gaiyawa mame Usiwa oya waivine pirisi painauvitwa ane. Me nau undag di ane oieba onan.

## 8

### *Agi Mataiwa Pirisi Painauvitwa Meuma*

<sup>1</sup> Nu divi vetewa natawa me mamaib. Pirisi painauvitwa numa me Apan me God painauvitwa kwiminauwa kin seyaeba nanin yutanwa apa wakeiviwa. <sup>2</sup> Me nau aivi at iyakaisiyapama apa. Me tabenako\* natawa Ayapan sine, iyayapan onan.

<sup>3</sup> Pirisi painauvitwa undag tamne puyo ge puyo maeba wantan oya. Meoya Pirisi painauvitwa mame gaibu divi da autanit di puyo wantan oya. <sup>4</sup> Keriso piyu mame danave wakeigimpewa, me pirisi den apa. Kuyawa iyayapan mu Gwangwan gumbe puyo wanemewa wakeeme.

---

☆ 7:25: Rom 8:34   ☆ 7:27: Ibr 5:3   \* 8:2: God gweyawa wape kokawa gumbe umemewa.

<sup>5</sup> ✧ Iyayapan mu nau mumawa eme, kwimin danave wa-keemewa guwawa ge gugup gumbo. Dividivi undag mame mu God me Mosisi toewannewa mina. Mosisi me tabenako amatog sitan kumiwa apa, God toewanne. God wanewa, “Yaukapa. Ne toyau genna. Me gumbe ge dividivi undag ainama.” <sup>6</sup> ✧ Megara gare mame, Keriso me nau oraivitwa aune. Kuyawa me yapave yum tuivi abnawa ane gwangwan agiyawa gumbe. Gwangwan agiyawa mame agi oraivitwa gumbe ane.

<sup>7</sup> Gwangwan agiyawa namuwa me oraivitwa ipewa, mataiwa at meuma onan. <sup>8</sup> ✧ Megara God anonewa namuwa me oraivitwa onan, meoya me mamaib wane, “ ‘Ayapan waivi, yauya, kum onivi.

Me kumiwa apa, ne gwangwan agiyawa mataiwa atna Isuraeru gweyawa ge Juda gweyawa gaibu.’

<sup>9</sup> Ayapan waiviwa,

Ne Ejipt apa isimuranaiwa naninap bog anedna, me kumiwa apa ne gwangwan agiyawa nunganwa ana. Gwangwan agiyawa mataiwa me nunganwa mina onan. Mu gwangwan agiyawa neuma den amaraya, meoya ne den amara munna.’

<sup>10</sup> Ayapan waiviwa,

Kum da apa ivi, gwangwan agiyawa atna Isuraeru gweyawa gaibu.

Me mamaib. Ne Gwangwan neuma anoano muma danave entna, sira nonomagowa gumbe tetna. Ne God muma atna, mu iyayapan neuma ape.

<sup>11</sup> Mu owawa den toyau mumpe, sira tatawaiwa den toyau mumpe.

Mu den wape ‘Ye Ayapan di yaug anoya.’

Iyayapan undag ne yaug ano nekpe, ud torawa apa aig iyai tayawa gumbo.

<sup>12</sup> Kuyawa ne kukaeba anoemewa anog yankwetna, ne kukaeba muma sira den yaug anotna.”

<sup>13</sup> God wane gwangwan agiyawa “Mataiwa”, me kumiwa apa, me wanewa namuwa me nunganwa. Divi da aita toivi ge namuwa kukainewa me koni onanape.

## 9

### *Tabenako Danave Waiya Atanwa*

<sup>1</sup> ✧Gwangwan agiyawa danave waiya gwangwaneba ge at Iyakaisiyapama wakeya. <sup>2</sup> Tabenako mu baraug siya. Pantut danave namiwa apa kendoro deriyateba ge teboro ge bredi puyowawa wakeya. Mu wayawa At Iyakaisiyapama. <sup>3</sup> ✧Pantut duwameba wapeyawa daieve, pantut da wakene. Mu wayawa At Iyakaisiyapama Painauvitwa. <sup>4</sup> ✧Me apa, gooru kem iyakaisi meuma tayawa oraimina oya wakene, sira gwangwan agiyawa bokesiyawa me gooru gumbe wariyawa wakene. Bokesi danave gooru ap me danave mana wakeyawa, ge Aaron tutu meuma me sivisip tonewa, ge an pepetuwa gwangwan agiyawa tenewa wakeya. <sup>5</sup> ✧Sira bokesi egave, serubim eyawa gumbe wakene. Me maviwa gumbe kukaeba numa aug aitanwa noiwa umne. Megara ne oma den ane mame oya undag watna.

<sup>6</sup> ✧Dividivi undag mame wait tamibarip aya onananewa, pantut namuwa danave piri si evedni unigiya sira waiya aya. <sup>7</sup> ✧Pantut duwameba danave, piri si painauvitwa mekut kum desirom mekut bairawan evedni

---

✧ 9:1: Eks 25:23–26:30 ✧ 9:3: Eks 26:31–33 ✧ 9:4: Eks 16:33; 25:10–16; 30:1–6; Nam 17:8–11; Deu 10:3–5 ✧ 9:5: Eks 25:18–22 ✧ 9:6: Nam 18:2–6 ✧ 9:7: Rvt 16:2–34



unigeme. Di onanwa me den unikpe. Di me membovit oya sira kukaeba iyayapan pimpanmuteg ayawa oya. <sup>8</sup> Mame gumbe Guwawa Iyakaisiyapama mamaib toyau nunivi. Pantut namuwa ande wakenewa, At Iyakaisiyapama Painauvitwa ebuwawa me ande den watabne. <sup>9</sup> ☆ Mame me guwaguwawa kum mame garewa oya. Gwangwan gumbe puyo ge puyo maeba waneme, megara me oma den ane iyayapan mu waiya emewa nonomagowa oraiminavit ape. <sup>10</sup> Dividivi mame me nakwai, yoi ge divi da muintanwa mina oya. Me gwangwan kwapunwa oya. Me nau warigimpe ano mataiwa meve yaug anope.

### *Keriso Diyawa*

<sup>11</sup> Keriso uwane pirisi painauvitwa me dividivi undag oraivitwa wait anewa atan oya. Me tabenako kokavitwa ge oraivitwa unig dauwag aine. Tabenako mame iyayapan nanuwo den siya, gae dawa gumbe aib vete, me ambuwa ayawa ube. <sup>12</sup> Sira me di meuma aug, me mae goot go burumakau usiwa di muma onan, At Iyakaisiyapama Painauvitwa unigne koni desirom mekut, sira gwiruwat nunne yaibobot oya. <sup>13</sup> ☆ Mae goot ge mae burumakau apanwa diyawa sira mae burumakau vesinwa atapupuwawa mu miyot igiyawa kwapuwa puwameme. Me oma ane miyot igiyawa kwapuwa muimpe ipewa, <sup>14</sup> ☆ Keriso diyawa me oma ane nonunmagawa muimpe. Keriso me miyot onan. Me diyawa Guwawa yaibobot gumbe God puyo wanne. Me diyawa nonunmagawa muimpe, sira anumpe bo gumbe tam ube tenumpe. Me meis anumpe bira God wakeiviwa nau meuma emewa.

<sup>15</sup> Natawa mame oya, Keriso me yapave yum tuiwiwa gwangwan agiyawa mataiwa gumbe. Gwangwan agiyawa namuwa gumbe iyayapan nu ano kukaeba atu. Keriso

☆ 9:9: Ibr 10:1-2      ☆ 9:13: Rvt 16:15-16; Nam 19:9,17-19; Ibr 10:4

☆ 9:14: 1Pi 1:18-19

botone kukaeba numa muimpe sira gwiruwat nuntan oya. Me gumbe, iyayapan ambuwa munan auwanewa oma ane kwan yaibobot agiyawa aupe.

<sup>16</sup> Bo atan gigirumawa me anoivi bo meuma umumawa oya. <sup>17</sup> Namu apan bo ape, ivi bo atan gigirumawa oma ane nau watpe. Apan me wakeiviwa, bo atan gigirumawa me oma den ane nau watpe. <sup>18</sup> Meoya di onanwa gumbe, gwangwan agiyawa namuwa den ane. <sup>19</sup> ✧Mosisi me Gwangwan desirom desirom me gumbe iyayapan undag wag dirumne. Meve me yoi ge sip gumawa diyapam ge wayo Isop kwayawa tamne, sira burumakau usiwa ge mae goot diyawa tamne. Meve me gwangwan agiyawa bukaeba ge iyayapan gumbo di yoi mina veramne. <sup>20</sup> Sira me wane, “Mame me gwangwan agiyawa diyawa me God yenan oya anewa.” <sup>21</sup> ✧Sira ebu desiroma, me tabenako ge dividivi undag waiya gumbe aigimtan oya di yoi mina veramne. <sup>22</sup> ✧Meoya nu oma ane wata, Gwangwan gumbe dividivi undag di gumbe wad muinta. Di den aikpawa, me anog yankwetanwa onan.

<sup>23</sup> ✧Dividivi mame gumbo, dividivi undag kwiminawu wakeyawa oya anog imug imug atanwa me di wad muintan di. Megara dividivi undag kwiminawu wakeyawa me di wad muintan di divi da oraivitwa gumbe. Me mame mina onan. <sup>24</sup> Keriso kwimin danave unigne. Me kwimin imug imug onan sira at iyakaisiyapama nanuwo ayawa onan. Me kwimin di. Sira me gare mame di God namive dauwag wakene nunan oya. <sup>25</sup> Piri painaivitwa bairawan evedni at iyakaisiyapama painaivitwa danave unigivi di upeba gaibu. Megara Keriso membovit den wanivi bairawan evedni. <sup>26</sup> ✧Me natawa onan ipawa,

---

✧ 9:19: Eks 24:6-8 ✧ 9:21: Rvt 8:15,19 ✧ 9:22: Rvt 17:11 ✧ 9:23: Ibr 8:5; 10:1 ✧ 9:26: Ibr 10:10

Keriso danadawai aupa bairawan evedni piyu amatonewa apa. Megara me piyu mame oieba apa uwane kum desirom mekut. Me kukaeba aug aitan oya membovit wantan gumbe. <sup>27</sup> Iyayapan undag kum da boriruwata, sira pui auta. Me natawa. <sup>28</sup> Mame mina, Keriso kum desirom membovit wanne iyayapan kukaeba muma autan oya. Me kum duwameba sira uwapewa, iyayapan kukaeba muma autan oya onan, megara iyayapan mu waita gumbe auwatan oya anoemewa waita mumpe.

## 10

### *Keriso Membovit Wanne Iyayapan Undag Munan*

<sup>1</sup> Gwangwan me gugup gaibu. Gugup me toyau nuniwiwa oraiwa matai oniviwa oya. Gugup me natawa gaibu onan. Iyayapan God oya bairawan evedni omomewa me puyo maeba desirom gumbe. Meoya Gwangwan oma den ane iyayapan oraivit ape. <sup>2</sup> Me meis di apa ipawa, mu puyo maeba wantanwa yankwepono? Kuyawa waiya eme igiyawa mu muinne esine, sira mu kukaeba muma sira den yang anoya. <sup>3</sup> Megara puyo maeba mame gumbe, mu kukaeba muma sira yang anoya. <sup>4</sup> ☆ Mae burumakau apan ge mae goot diyawa me oma den ane kukaeba muma aug aipe.

<sup>5</sup> ☆ Meoya Keriso piyu mame uwag wane,  
 “Ge puyo maeba ge puyo topayana,  
 sira nenanwa oya kwapiwa tamibarip ana.

<sup>6</sup> Ge puyo maeba undag okeremewa sira puyo maeba ano kukaeba oya gumbo ge gungap oma den ane,  
 topayana.

<sup>7</sup> Meoya ne wana, ‘Gare ne mapa uwana.  
 Buka da Baiboru danave wakenewa gumbe nenan tenewa mina,

---

☆ 10:4: Ibr 9:13    ☆ 10:5: Sam 40:6-8

God, ge anoegewa atanwa oya ne uwana.’ ”

<sup>8</sup> Namu me wane, “Mae puyowawa, puyo, puyo maeba undag okeremewa sira puyo maeba ano kukaeba oya,—dividivi undag mame mu Gwangwan gumbe wanemewa,—ge me oya den anoegewa. Sira ge gungap oma den ane.” <sup>9</sup> Sira wanewa, “Gare, ne mapa uwana anoegewa atanwa oya.” Me duwameba aug yoitan oya namuwa itan kwene. <sup>10</sup> ☆God anoiviwa gumbe Iesu Keriso kwapiwa kum desirom mekut wanne. Me gumbe, nu muin nunne esine iyakaisi atu.

<sup>11</sup> ☆Sira pirisi undag kum evedni yoieg waiya nau meuma eme, sira puyo maeba desiroma waneme. Megara dividivi mame oma den ane kukaeba aug aipe. <sup>12</sup> Megara Keriso me kukaeba muma aug aitan oya yaibobot puyowawa desirom mekut wanne. Meve me God seyaeba yutanwa apa wakeivi. <sup>13</sup> ☆Sira me gare mame wakeg amaraivi, ivi anaviyawa amawa deriyateba ape. <sup>14</sup> Keriso me puyo desirom gumbe iyayapan oya nau ane onanane viripusiwa onan, anotumat igiyawa me iyakaisiyapama atan oya.

<sup>15</sup> Guwawa Iyakaisiyapama gaibu nunan oya mamaib taibe waivi,

<sup>16</sup> ☆“Ayapan waiviwa, kum mame ivi, ne gwangwan agiyawa gumbo atna. Me mame.

Ne Gwangwan neuma nonomagave barautna, sira nonomagave g girum tetna.

<sup>17</sup> Sira me waiviwa, “Ne kukaeba muma ge naunababat muma sira den imug anotna.”

<sup>18</sup> Dividivi mame God anog yankwene, meoya me apa nu kukaeba puyowawa wantanwa den anoete.

---

☆ **10:10:** Ibr 9:12 ☆ **10:11:** Eks 29:38 ☆ **10:13:** Sam 110:1

☆ **10:16:** Jer 31:33; Ibr 8:10

*Wakewake Mataiwa Ebuwawa*

<sup>19</sup> ✧ Meoya tatangwanen, nu oma ane At Iyakaisiyapama Painauvitwa danave Iesu diyawa ge degadega gumbe unikta. <sup>20</sup> ✧ Iesu nunanwa oya ebu mataiwa yai-bobot wakeigimtanwa ane, ankwin wapeyawa kokawa me wata me membo kwapiwa gumbe. <sup>21</sup> Sira nu pirisi painauvitwa me God gweyawa amaraiwiwa autu. <sup>22</sup> ✧ Di meuma nonunmagawa apa di yoi mina veramne, sira nonunmagawa kukaeba wakenewa muinne, sira yoi iyakaisiyapama gumbe kwapunwa muinne. Meoya anotumat oraivitwa ge nonunmagawa oraivitwa gumbe, God oya anta. <sup>23</sup> Apan me agi nunnewa me anotumat apan. Meoya anoetewa oya atan man onan siwavit yoig nu wata. <sup>24</sup> Sira yusiwa gara wan ag, gara wa ata gara baigan niyata, anoano oraiwa ata. <sup>25</sup> ✧ Iyayapan upeba desirom agonyatanwa topaieme. Ye meib den aigimiya. Ye gara waita aigimiya. Kum onivi koni aivi, meoya nu meib di aigimta.

<sup>26</sup> ✧ Nu ano natawa wait autu. Nu kukaeba meib di aigimtawa, me apa kukaeba puyowawa da onan. <sup>27</sup> ✧ Meiba oya nu puyuyu kumiwa ge iyam oya amaraigimta. Me apa ebu da ampa onan di. Iyam mame me iyayapan ambuwa God anavi emewa undag igampe. <sup>28</sup> ✧ Bira da Mosisi Gwangwaneba topayanewa, duwam go duwamdesi yangowo yauyawa gumbo ui onan gumbe tope boape. <sup>29</sup> ✧ Ye yaug anoya. Bira da God Usiwa amave yan empe, sira me gwangwan agiyawa diyawa me iyakaisi anumpewa yan yaupé, Guwawa me ano oraiwa nuniviwa ayamat den ape ipewa, me anintom mina ibnapamit aupe? <sup>30</sup> ✧ Nu Me yaug anotu. Me wane, “Garawa atanwa

---

✧ **10:19:** Ibr 4:16 ✧ **10:20:** Mat 27:51 ✧ **10:22:** Rvt 8:30; Ejk 36:25; Epe 5:26 ✧ **10:25:** Ibr 3:13 ✧ **10:26:** Ibr 6:4-8 ✧ **10:27:** Ais 26:11 ✧ **10:28:** Deu 17:6; 19:15 ✧ **10:29:** Mat 12:30-32; 1Ko 11:27-29 ✧ **10:30:** Deu 32:35-36; Sam 135:14

me ne ano neumawa. Ne matai garawa atna,” sira wane, “Ayapan iyayapan pui yu mumpe.” <sup>31</sup> God wakeiviwa nani danave aiktanwa me ui aeba.

<sup>32</sup> Kum namuwa apa, ye eyawa guniyap esine, me apa ivi ye mut kokawa gumbe edawai auveg uiwa nikiayana. Me kumiwa apa yaug anoya. <sup>33</sup> Ye upeba mu iyagau ge yuaore toaore gumbe edawai auyana iyayapan obiren namuwo. Sira ye upeba iyayapan mu gaibu desirom toborayana. <sup>34</sup> ✧Ye iyayapan nog danave wakeemewa munan danadawai auyana. Ye yaug anoyana ye tawara oraiwa me yaibobot tawaraeba wait auyana. Iyayapan upeba tawara yeuma oraiwa guniyap aug ampe, megara me kumiwa apa ye degadega gumbe me auyana.

<sup>35</sup> Meoya anotumat yeuma den aoreya. Me garawa yeuma obiren yempe. <sup>36</sup> Ye uiwa di nikiatanwa yaug anoya. Me gumbe, ye God ano meuma aya, meve divi da God agi wanewa auya.

<sup>37</sup> ✧“Kum kusi onanapeve, apan me uwatan aiviwa me uwape.

Me pungi den wape.

<sup>38</sup> Apan oraiminavitwa neuma me anotumat gumbe wakeivi.

Me a ag sira daieven aipewa, ne degadega den atna.”

<sup>39</sup> Nu a ag daieven am wakukamtanwa igiyawa onan. Nu anotumat ag inaiinai amaraigimtanwa igiyawa.

## 11

### *Anotumat Gumbe*

<sup>1</sup> ✧Gare, anotumat gumbe anoetewa me uwatanit di, sira anotumat ape iyayapan yusipamit anope guwavewa oya sira anope me natawa. <sup>2</sup> Iyayapan namuwa anotumat muma gumbe wag waiyeme.

<sup>3</sup> ✧ Anotumat gumbe nu yaug anotu piyu mame God gaiyawa gumbe wadne. Sira dividivi yawag anoetewa me dividivi yawag anoetewa gumbe den wadne. <sup>4</sup> ✧ Anotumat gumbe, Aber puyo oraivitwa wanne, Kein mina onan. Puyo me gumbe gae umum aune, Aber me apan oraivitwa. Kuyawa God wane Aber puyo meuma me puyo oraimina. Me botone, megara me anotumat meuma gumbe iyayapan me oya gare ande veme.

<sup>5</sup> ✧ Anotumat gumbe, God ane Enok at da aine bo den yautanwa oya. God ane me aine, meoya iyayapan oma den ane sira me yaupe. Namu God wanewa Enok gumbe me degadega ane, ivi God ane me aine. <sup>6</sup> Anotumat onanwa me gumbe God degadega den aivi. Bira da God gumbe aivinewa me dividivi mameiba me di anotumat atanit di. Me God meib di wakeiviwa, sira apan ambuwa God oya didimama aiviwa gumbe God matai garawa wampe.

<sup>7</sup> ✧ God me Noa dividivi me den yaunewa gumbe wag dine, me kumiwa apa anotumat gumbe Noa iyakaisiyapama namive a ane, meve vesin ud meuma waita muntan oya me wa koka sine. Wa koka me gumbe, me anewa piyu mame kukaeba, sira oraivitwa anotumat gumbe kwan autanwa abnawa ane. <sup>8</sup> ✧ God Ebraam dig wane at asime aga me ge kwan geuma, me kumiwa apa anotumat gumbe Ebraam noiwa aune. Me den yaug anone ampa aipe, megara me tam aine.

<sup>9</sup> ✧ At me God agiyawa wanewa apa me anotumat gumbe at da igiyawa mina wakeivi. Aisak ge Jakob mu mina agi me desiroma kwan igiyawa. Me tent\* danave mu gaibu wakeeme. <sup>10</sup> Me gwetoimu me gwe kuiyawa

---

✧ **11:3:** Gen 1:1; Sam 33:6; Jon 1:3    ✧ **11:4:** Gen 4:3-10    ✧ **11:5:** Gen 5:21-24    ✧ **11:7:** Gen 6:13-7:1    ✧ **11:8:** Gen 12:1-5    ✧ **11:9:** Gen 35:12    \* **11:9:** Me gwe wape kembesi minawa gumbe siemewa.

oraiminawa yautan oya anoivi. God me gwetoimu anog sine.

<sup>11</sup> ✧ Seira me aita tone ud auwatanwa onan, megara God ane Seira yusiwa aune bug atanwa oya anotumat gumbe. Me yaug anone bira agi me wannewa me anotumat abnawa. <sup>12</sup> ✧ Meoya apan da, Ebraam me bo apan mina anewa me gumbe usitainawa obiren. Mu obiren marantun yayab yane sira poeman visive nuge mina.

<sup>13</sup> ✧ Iyayapan mame undag mu anotumat danave boriruwaya. Mu divi da agi munnewa den auya. Megara mu at yauya painauvit, sira degadega gumbe nuntosa aya. Mu taibe wayawa mu piyu mame danave at da igiyawa ge amdau igiyawa. <sup>14</sup> Mu aib waya. Natawa me mu at muma oya yawag anoeme. <sup>15</sup> Mu at muma ampa onamiyawa oya anoigimponono, mu mina ane watavit sira taig arowon ampono. <sup>16</sup> Megara baina, mu at muma kwiminawuwa me at muma oraiwa oya anoigimpono. God me God muma watanwa gumbe ubmam onan. Me gwetoimu muma oya wait tamibarip ane.

<sup>17</sup> ✧ God me Ebraam gumbe amaorot ag wanne. Me kumiwa apa, me Aisak puyo ag wanne. Ebraam gumbe God agi wait wanne, megara me usiwa desiromirenwa puyo ag wanne. <sup>18</sup> God Ebraam gumbe wane, “Ud Aisak gumbe yaipewa me wape ge dam geuma apa yaig onnewa. <sup>19</sup> ✧ Me yaug anonewa God oma ane bo abnawa ape sira inaipe. Meoya me Aisak boriruwayawa gumbo sira aune. Mame me gwaguwawa.

<sup>20</sup> ✧ Anotumat gumbe Aisak me kum iviwa oya Jakob ge Esou waribiya munne.

---

✧ **11:11:** Gen 18:11-14; 21:2; Rom 4:19    ✧ **11:12:** Gen 15:5; 22:17  
 ✧ **11:13:** Gen 23:4; 1Kr 29:15; Sam 39:12; 1Pi 2:11    ✧ **11:17:** Gen 21:12;  
 22:1-14    ✧ **11:19:** Rom 4:17    ✧ **11:20:** Gen 27:27-29,39-40



<sup>21</sup> ✧ Anotumat gumbé, Jakob bo aiviwa kumiwa apa me Josep usitainawa desirom desirom waribiya munne, sira tutu meuma gumbé yug yokeg waiya ane.

<sup>22</sup> ✧ Anotumat gumbé, Josep bo aiviwa kumiwa apa me Isuraeru usitainawa a dauwag amomewa oya gae wag dirumne, sira me marednawa meuma oya wag toewan munne.

<sup>23</sup> ✧ Anotumat gumbé, Mosisi yaine kumiwa apa, me inamamawa mu Mosisi guwawe barauya dud duwamdesi onanane. Kuyawa me ud yauyawa me monak. Mu kin gwangwan meuma oya den a aya.

<sup>24</sup> Anotumat gumbé, Mosisi koka aivi kumiwa apa, me Paro gwaitawa usiven atan wayawa me topayane.

<sup>25</sup> Me watgomiyane God iyayapan meuma gaibu edawai autan oya. Kukaeba degadega oya autanwa me den watgomiyane. <sup>26</sup> Ejipt tawara oraivitwa me kusi, megara gae kukaeba Mosisi gumbé Keriso oya uemewa me koka. Mosisi meib anone. Me garawa oya yavivi. <sup>27</sup> Anotumat gumbé, me kin danapiriwa gumbé den a ane, sira Ejipt yankweg aine. God me guwavewa, megara Mosisi me nonemagawa gumbé me God yaug uiwa nikiyane.

<sup>28</sup> ✧ Anotumat gumbé, ud namu yaiyawa mu guttanwa abnawa den yumampe oya, me Uwag Gaveya Buyunaeba aune sira di gumbé yoi mina veramne.

<sup>29</sup> ✧ Anotumat gumbé, mu Poeman Diyapama, piyu kararuwa mina amog dauwaya. Ejipt igiyawa meib mina atan oya ageyau aya, megara mu poeman nono namne.

<sup>30</sup> ✧ Anotumat gumbé, iyayapan Jeriko pui yuyawa apa pura desirom gumbé birorot paneme, meve pui yuyawa Jeriko gwagwai an gumbé siyawa biyaug aigne.

---

✧ **11:21:** Gen 47:31-48:20 ✧ **11:22:** Gen 50:24-25; Eks 13:19 ✧ **11:23:** Eks 1:22; 2:2 ✧ **11:28:** Eks 12:21-30 ✧ **11:29:** Eks 14:21-31 ✧ **11:30:** Jos 6:12-21

<sup>31</sup> ✧ Anotumat gumbe, Reiab me uinantaraki vesinawa, kaipat igiyawa yum gumbe tamne, meoya me den bo ane anotumat onan igiyawa gaibu.

<sup>32</sup> ✧ Ne sira anin waten? Ne sira Gideon, Barak, Samson, Jepta, ge Devid, Samueru munan gae watnawa, kum oma den ane. <sup>33</sup> ✧ Anotumat gumbe, mu at da auya, dividivi oraiwa gumbe amaraya, dividivi God agi gumbe wanewa auya, mae raion noiwa toboriya. <sup>34</sup> ✧ Iyam igiviwa puwamiya, deba donawa ayun wariya, mu yutuwa onan megara God gumbe yusiyusi aya, mu mut igiyawa yusipamit aya, sira at da mut igiyawa guriya. <sup>35</sup> ✧ Vesin upeba oya, God ane boriruwayawa upeba mu bo gumbe sira inaimusia. Sira iyayapan upeba inuwa nog gumbe den tam tepe dauwape, sira edawai muniya. Kuyawa mu sira inaitanwa oraiwa autan anoya. <sup>36</sup> ✧ Sira iyayapan upeba gumbo iyagon muniya, murap gumbe guriya, ayan murapeba sein gumbe tuwamiya, sira nog danave temuniya. <sup>37</sup> ✧ Sira mu an gumbe guriya. Sowa gumbe mu tui amiya, deba gumbe kwapamiya boriruwaya, mae sip ge mae goot kwapuwa wape mina enam amome, pukpuk wagawag igiyawa aya, edawai kokavit auya. Iyayapan den yaug anoya oya edawai muniya. <sup>38</sup> —Piyu mame mu gumbo oraimina onan.—At inguiwa arawa, tui arawa ge dagup ge nog apa, mu pipam mutag gigeme.

<sup>39</sup> Iyayapan mame munan aib waya, mu anotumat oraimina auya. Megara iyayapan mame mu divi da agi munnawa den auya. <sup>40</sup> God namiven dividivi oraivitwa

---

✧ **11:31:** Jos 2:1-21; 6:21-25; Jms 2:25    ✧ **11:32:** Jaj 4:6-5:31; 6:11-8:32; 11:1-12:7; 13:2-16:31; 1Sm 16:1-1Ki 2:11; 1Sm 1:1-25:1    ✧ **11:33:** Dan 6:1-27    ✧ **11:34:** Dan 3:23-27    ✧ **11:35:** 1Ki 17:17-24; 2Ki 4:25-37  
 ✧ **11:36:** 1Ki 22:26-27; Jer 20:2; 37:15; 38:6    ✧ **11:37:** 2Kr 24:21

nunanwa tamibarip ane, meoya God den ane mu mukut oraivitwa aya nu gaibu onan.

## 12

### *God Me Usitainawa Toyau Munivi*

<sup>1</sup> ✧ Mame mina, irikup mina iyayapan obiren bira yangowo yauyawa birorot umanne. Meoya nu ibnawa undag ge kukaeba undag yankweta. Kin namunup wakene. Nu unuwa nikiyag ebu yaug tog anigimta. <sup>2</sup> Yangunwa tem tem Iesu yavigimta. Iesu me anotumat numa amatonewa ge anotumat numa aivi oraivit aiviwa. Iesu namive degadega wakene, meoya ubmam oya den anone, uiwa nikiyag korosi aune. Meve me God naniwa yutanwa apa yan wakene. <sup>3</sup> Kukaeba eme igiyawa mu Iesu gumbe noiwa den auya. Me uiwa nikiyane. Ye Ayapan mame me oya anoya. Me ye nonemagewa yusi den uwatan oya sira uiwa den topayatan oya.

<sup>4</sup> Ye kukaeba oya mut ayana, megara ye di den auyana, kuiyawa ye yaigipamit den toboriyana. <sup>5</sup> ✧ Ye guniyap toyau yemiyawa wakene. Me wanewa usitainowa gumbo waiviwa mina. Ye imuiwa atataine. “Utunwa, Ayapan geuma togigimpewa me bembemu onan, me ibnapam.

Ayapan dirug wapewa yutugwa den uwape.

<sup>6</sup> Kuiyawa Ayapan me iyayapan baigan muniviwa mu toyau munivi.

Usitainawa undag me tamtanwa me gutpe.”

<sup>7</sup> ✧ Yaug anoigimiya me ag yautanwa oya, ye uiwa nikiyaigimiya. God me ye ag yavemivi, kuiyawa ye me usitainawa. Bira da mamawa usiwa den tope go? <sup>8</sup> Ye den gurepewa me undag autanit di den auyawa, ye ebu taibe

---

✧ 12:1: 1Ko 9:24-25 ✧ 12:5: Job 5:17; Pro 3:11-12; Rev 3:19 ✧ 12:7:

usitainawa, ye me usitainawa onan. <sup>9</sup> Sira nu kwapunwa mamunwa autu, sira mu toewan nuniya. Nu munan ayamat atu. Sira obiren nu guwunwa mamunwa gumbe ayamat ag wakeigimta? <sup>10</sup> Kuyawa kwapunwa mamunwa toewan nunemewa, me kum kusida pipi, sira me mu anoemewa oraiwa gumbe. Megara guwunwa mamunwa toewan nunemewa, me oraiwa numa oya, sira nu me iyakaisiyawa autanwa oya. <sup>11</sup> ✧ Toewanewan undag me degadega mina yawatanwa onan, megara yautanwa me danadawai. Megara kum ivi me yum natawa impe toewan munemewa munan.

<sup>12</sup> ✧ Meoya ame naniwa yusi uwayawa wanit auya, yusiwape. <sup>13</sup> ✧ Sira ebu siwabit waribiyaya amewa oya. Amo gegeraimusiawa mu den uyug aikpe oya, obiren mu amowa matai oraimina ape.

<sup>14</sup> Iyayapan undag ape yum gumbe wakeigimiya, sira iyakaisi oya anoya. Bira da iyakaisi den apewa, me Ayapan den yaupe. <sup>15</sup> Meoya, ye iyayapan upeba yaimoyai yawamigimiya, bira da God ano oraiwa gumbe uyug aikpetan, sira sisiwa taiwa biyaupewa me ibnawa koka apetan, mame gumbe iyayapan obiren miyot umampetan.

<sup>16</sup> ✧ Sira uinantaraki igiyawa den wakepe. Esou me anotumat abnawa onan. Me usiwa namu yainewa kwanawa meumawa wanne nakwai desirom gumbe. Meoya bira da Eso mina den ape. <sup>17</sup> ✧ Ye ebu aninin aivinewa yang anoyana. Ivi me waribiya kwanawa autan anoivi, megara yankwene. Iripam nun wane, megara Esou den yang anone ampa ano meuma tobiyape.

<sup>18-19</sup> ✧ ✧ Ye den manene. Tui me nu oma ane nanunup yumtawa, iyam me igiviwa, irikup puntonewa,

---

✧ **12:11:** Jms 3:17-18    ✧ **12:12:** Ais 35:3    ✧ **12:13:** Pro 4:26

✧ **12:16:** Gen 25:29-34    ✧ **12:17:** Gen 27:30-40    ✧ **12:18-19:** Eks

19:16-20; 20:18-21; Deu 4:11-12; 5:22-27    ✧ **12:18-19:** Eks 20:18-21; Deu 5:22-27

sisip, taig okup, kae trampet noiwa sira gae noiwa kokawa mu gumbo ye den manene. Iyayapan gae noiwa kokawa mame anoyawa sira da utupa den di wape anoya. <sup>20</sup>☆Gwangwan yusipamit wakene, “Mae tui yumpewa, me an gumbe tope, sira iyayapan me mina meib.” Mu oma den ane Gwangwan mame gumbé uwa nikiyaya. <sup>21</sup>☆Irawa yawatanwa me ui aeba ane. Meoya Mosisi wane, “Ne a eni. Daram daram eni.”

<sup>22</sup> Megara tui Saion, God wakeiviwa toimuwawa, Jerusarem kwiminauwa, aneya obiren buyunaeba mu gumbo ye manene. <sup>23</sup> Sira ud namuwa siosi mumawa, mu kwiminau ivuwa teyawa, God me iyayapan undag pui yumtanwa, iyayapan oraiminawa guwowa, God a munne guwowa oraivitwa. <sup>24</sup>☆Sira Iesu me yapavewa gwangwan agiyawa mataiwa oya, me gumbé ye manene. Di yoi mina veramiviwa me gumbé ye manene. Me oraimina megara Aber diyawa mina onan.

<sup>25</sup> ☆Ye yaiyai yaukape. Bira da gae waiviwa den topaya. Kuiyawa piyu mame apa iyayapan upeba apan ambuwa gumbé gae waiviwa mu topayaya, meoya mu pui yumunne. Iyayapan mu apan ambuwa gumbé kwiminau gae waiviwa mu daiyowa tobiyag wampewa, mu matai pui yumumpe. <sup>26</sup>☆Me kumiwa apa, noiwa piyu ipuniyane. Megara kum mame, me agi ag waivi, “Ne sira atna piyu mame ipun ape. Piyu mame mekut onan, megara kwimin gaibu.” <sup>27</sup> “Sira” natawa meumawa me mamaib. Dividivi undag anewa me sira ipuniyape, meve aug aipe. Dividivi undag ambuwa den ipuniyapewa me yaibobot wakepe.

<sup>28</sup> Meoya, nu God toimuwawa me den ipuniyaiviwa wait autuwa, nu God gumbé gaun wanta. Mame mina, nu

---

☆ 12:20: Eks 19:12-13    ☆ 12:21: Deu 9:19    ☆ 12:24: Gen 4:10; Ibr 8:6    ☆ 12:25: Ibr 2:1-3; 10:26-29    ☆ 12:26: Aga 2:6

oma ane God gumbe ayamata ge a gumbe meib di aigimta.  
 29 ☆Kuiyawa God numawa me iyam me dividivi undag  
 oketpe itpewa.

## 13

### *Nau Oraiwa Me God Degadega Ape*

1 Nu tatangwanen, ye meib baigan garagara ag  
 wakeigimiya. 2 ☆Amdau igiyawa gumbo den imuiwa  
 atataipe baigan munigimiya. Iyayapan upeba aneya  
 gumbo mameib baigan muneme. Iyayapan mu den yaveg  
 anoya mu aneya. 3 Ye mina nog aigtanwa oya anoigimiya.  
 Sira ye kwapuiwa gaibu, meoya iyayapan ambuwa edawai  
 auemewa mu munan anoigimiya.

4 ☆Iyayapan undag memgebip gumbe ayamata atanit  
 di. Memgebip gomaeba me iyakaisi atanit di. Kuiyawa  
 garadi eme igiyawa ge uinantaraki igiyawa gumbo matai  
 mu God pui yuwampe. 5 ☆Anmaga oya den anogugut  
 aigimiya. Dividivi guniyap wakeyawa me gumbe ye de-  
 gadega aigimiya. Ayapan me membo wane,  
 “Ne ye den yankweyempna, sira ne ye den epa  
 aoreyempna.”

6 ☆Meoya nu yusipamit taibe wata,  
 “Ayapan me waita negivi abnawa. Ne a den atna. Iyayapan  
 aninin ne gunap ape?”

7 ☆Amara yeneme igiyawa mu God gaiyawa oya gu-  
 niyap wayawa yaug anoya. Kum muma oieba oya yaug  
 anoigimiya, anotumat mumawa mina anog aisigimiya.

8 Iesu Keriso me desiroma watau garewa yaibobot tunano.

---

☆ 12:29: Deu 4:24; 9:3    ☆ 13:2: Gen 18:1-8; 19:1-3; Rom 12:13    ☆ 13:4:  
 Epe 5:5    ☆ 13:5: Deu 31:6,8; Jos 1:5    ☆ 13:6: Sam 118:6    ☆ 13:7:  
 1Ko 4:16

<sup>9</sup> ☆ Toewanewan gina ubeube gumbé den ipunapun ag tobiyag aisiya. Nakwai gumbé onan, megara ano oraiwa gumbé ye nonemagewa yusiwapewa, me oraimina. Iyayapan mu nakwai oya kokavit anoemewa den waita auya. <sup>10</sup> Nu iyakaisi kem meuma gunup wakene. God tabenako apa nau eme igiyawa, mu kem iyakaisiyapama apa natanwa oya yutuwa den auya.

<sup>11</sup> ☆ Pirisi painauvitwa me mae diyawa aug At Iyakaisiyapama Painauvitwa danave unig onivi kukaeba muma anog yankwetanwa puyowawa oya. Megara mae kwapiwa me iyayapan wakeemewa daieve oketpe.

<sup>12</sup> ☆ Meoya Iesu gaibu edawai aune at kokawa apa ankwin daieve, diyawa meuma gumbé iyayapan amumpe iyakaisi atan oya. <sup>13</sup> ☆ Meoya ubmam me Iesu aunewa nu meis auta, sira nu iyayapan wakeemewa arawa apa dauwag menan anta. <sup>14</sup> ☆ Kuyawa nu mapa yaibobot gwetoimuwawa den autu, megara nu gwetoimu me uwatanwa oya amarete.

<sup>15</sup> ☆ Meoya nu evedni Keriso gumbé waiya puyowawa wanigimta. Puyo mame me nounwa natawa iviwa gumbé gaun wanigimtan oya. <sup>16</sup> ☆ Oraiwa atanwa ge keb aigimtanwa imuiwa den di atataipe. God puyo mame gumbé degadega aivi. <sup>17</sup> ☆ Koukawa yeuma nouwa anog avigimiya. Kuyawa iyayapan mame yaiyai veme, sira ye guwewa amareme. Mu aigimpewa degadega gumbé, danadawai gumbé onan. Me meiba onanwa, me ye guniyap waita onan.

<sup>18</sup> ☆ Nunan nun waya. Nu yusipamit imug anoetewa nonunmagawa me oraimina, sira nu anoetewa dividivi

---

☆ **13:9:** Rom 14:17    ☆ **13:11:** Rvt 16:27    ☆ **13:12:** Jon 19:17  
 ☆ **13:13:** Ibr 12:2    ☆ **13:14:** Ibr 11:10,16; 12:22    ☆ **13:15:** Sam  
 50:14,23    ☆ **13:16:** Pir 4:18    ☆ **13:17:** 1Te 5:12    ☆ **13:18:** Apa  
 24:16; 2Ko 1:12

undag yaiyai wakeigimtan. <sup>19</sup> Sira ne ye diruieni nun waigimiya. Ye meib di aigimiyawa, ne matai yenan koni uwatna.

<sup>20</sup> ☆ Iesu me sip amaraivi abnawa kokavitwa me God agiyawa yaibobot diyawa gumbe. Yum God me Ayapan numa Iesu bo igiyawa gumbo sira aug taig uwanewa. <sup>21</sup> Nu anoetewa, Yum God mame ye ayempe dividivi undag gumbe oraiminavit me Iesu Keriso gumbe. God mame me ano meuma guniyap ape, sira ye mina oma ane God ano meuma atan oya. Eyawa God gumbe meib di wakeigimpe oieba onan. Amen.

<sup>22</sup> Tangwanen, ye toewan waitawaita gaiyawa mame auya. Ne ghirum pipi tena.

<sup>23</sup> Ne imunap ye anoya gwanunwa Timoti nog gumbe barauya dauwane. Me tatevit uwapewa, ne gaibu onan guniyap uwata.

<sup>24</sup> Ye amara yeneme igiyawa ge iyayapan iyakaisiy-opama undag gumbo gaun muniya. Iyayapan mu at Itari apa onamiyawa ye guniyap gaun yeneme.

<sup>25</sup> God ano oraiwa ye undag guniyap wakeigimpe.



**GAE MATAIWA****The New Testament in the Maiwa language of Papua New Guinea  
Nupela Testamen long tokples Maiwa long Niugini**

copyright © 2011 Wycliffe Bible Translators, Inc.

Language: Maiwa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

---

PDF generated using Haiola and XeLaTeX on 8 Sep 2021 from source files dated 28 Aug 2021

45dcb14f-9541-5013-8907-63bcfabcd6b5